

四庫全書

集部

欽定四庫全書

集部
宋百家詩存卷二十

詳校官監察御史_臣孫家賢

主事銜_臣徐以坤覆勘

總校官庶吉士_臣倉聖脉

校對官中書_臣葉蘭

謄錄監生_臣馮蓋

欽定四庫全書

宋百家詩存卷二十

嘉善曹庭棟編

默堂集

陳淵字知默一字幾叟南劍州沙縣人了翁瓘之猶子也兒時動止不凡瓘器之謂能任重致遠者後從龜山楊時傳二程之學矻矻不倦漸摩道德究窮六經得師友淵源之正紹興間以薦知樞密院編修官

名對賜進士出身授監察御史歷官宗正少卿立朝
風裁卓卓以天下為己任因迂時宰罷去不大施於
用齋志以歿默堂集二十二卷門人沈度所編廬陵
楊萬里升序默堂其所居之勝也後學稱之曰默堂
先生

延平江上呈吳國華先生

青山如偉人可望不可制屹然瞰碧流龍翔虎豹視春
風何時來草木舞深翠禽鳥暖相依飛鳴得真意誰言

靜無作坐致無邊利願言斬茅茨結室傍蒼蔚且要觀
此身功業亦細事

和人獨酌

共矜春色盡銜杯文字紅裙各有儕何似西園閑處士
一杯花下畏人來

休論身外千端事且醉花前一榻風舉盞但能邀皓月
隔離何必喚鄰翁

崇安分水嶺

已見江南草木菲
筍輿愁下亂山圍
但將雙淚憑西注
寄語江神穩送歸

離紫溪驛

小風吹面雨廉纖
輕薄衣裳嬾更添
一線離情裁不斷
暮雲將過粵山尖

登睦州環峰亭

月照空山杜宇啼
喚歸漁艇夜天低
那堪又是雙溪水
獨上危樓十二梯

泊姑蘇憑滙亭候同行不至

扁舟繫岸五六日草屨遶亭千百迴欲行無計住不可
夢想萬事心如摧燕雀飛鳴意自適翩翩檐外相往來
乃知荆棘殊不惡培風萬里真勞哉

次韻李仲虎召伯相遇

區區千里為浮名小隱終慙鄭子真雙闕幾時瞻北極
萬山無處望南閩尊前壯士今如夢胯下真王迹已塵
共俯淮流追往事玉蟾依舊水鱗鱗

此地有樊
噲韓信廟

重陽後送謹常兄之符離

鑠外分攜處離觴話遠塗黃花看不足寒鴈去何孤
農圃非吾業衣冠本世儒應當慎行止無使世氛汙

九月二十二日秋舉失利出門用中相餞夜步

河上留別

太平今日古無鄰觸目郊原事事新年少自應迷鼓吹
野人終是厭埃塵忘懷處世思同俗有事關心不為身
藥石有能醫久痼此生寧復怨垂綸

錢塘過廖次山以詩見贈次韻

往來江海兩年餘，自怪鄉音已變吳。
尊酒每思難會面，客鄉何意復趨隅。
雨寒君未瞻天竺，水涸吾妨適鏡湖。
幸此徘徊緩分袂，笑譚猶得對冰壺。

未能去因此遂得
久於錢唐相會

次山有意遊湖阻
雨僕將適越水淺

次韻欲遊西湖阻雨

去年賞西湖，薄暑扳躋難。
同遊幸勝士，酒沃衣巾斑。
今歲來錢唐，臘雨扁舟寒。
友朋適四集，局蹙樊籠間。
此生

分林泉造物猶余慳未為登岳禱且作訪戴還無私本
天理敢怨陰雲頑向來旱蝗惡征賦亦未寬寧令風作
雪要看麥堆山

錢清待潮

江潮來去自有時扁舟閣淺心如飛岸容霜竹青照眼
春信雪梅香撲衣天寒鄞江道路阻歲晏錢清風俗非
故園回首二千里落日看盡行雲歸

蕭山雪中寄季修

南雪一尺餘茲事豈常有直恐春氣融不忍加以箒我
友隔千里無人共觴酒披衣坐短篷吟苦千呵手疾風
穿簾幕陰霧低窓牖思君欲乘興奈此衣見肘吾生為
已疏未即學耕耦要令天下肥自以一身後三登今告
祥此意亦云偶端能歌豐年擊壤和田叟

季修欲之仰山豫作詩送之

飄零今日海東偏見子奔馳不自憐洛社求師霜入屨
仰山尋隱草連天白雲南望家雖近壁水東來計已然

賴有從前息心地不令塵土化流年

季修舍舟趨諸暨謁劉元成獨泛錢清江有懷

其人

人遠牛羊暮春深草樹滋野橋低映水溪岸曲繁籬風
雨江湖思乾坤杖屨疑論心竟誰是短擢欲何之

觀獵

蒼鷹黃犬五花驄木落風高箭上弓三穴若能搜狡兔
九天方可下冥鴻

謁滿處沖歸以詩贈之

八年重見各蹉跎把酒論文奈別何
行止未應經埽地是非安用辯傾河
陽春屬和從來少流水知音不必多
妙語驚人慵舉似歸來如學病維摩

處沖為棲神導氣之術每曉起得意成詩四首
次其韻

功名亦誤人自古誰能了老大欲退藏
少壯知幾蚤彫墜班已齊宿鳥尚木杪
豈無山林心路長天杳杳

少時自樹立勁氣干雲霄一枕夢初覺萬古心何寥年
來畏禍機自悟空嶢嶢小窮不必送真隱誰能招

交關存龍虎經申學熊鳥嬰兒檢奔放姪女棲窈窕神

仙豈無術自為志已湫

勦音

晨興一炷香吾意窮三藐

朝氣爽不昏清淨天無霞善惡兩相融世慮遺塵沙疎
鐘下殘月餘響遞幽遐了失去來心淤泥出荷茄

秋夕

衰榆弱柳未經霜已見飄零片片黃雨後晚風生戶牖

莫將燈火汙清涼

七夕閨意戲范濟美

衡陽新鴈幾時歸
惆悵佳人萬事非
蓬首西風還拜月
夜涼贏得露霑衣

經年不復到庭除
又見秋風柳欲疎
看罷巧樓歸小閣
牀頭重檢近來書

次韻范濟美秋雨感懷

一別劔溪水三換京塵秋
夜聽空堦雨歲月驚如流
豈

不念故國水清山亦幽
螻蟻有微情未忍追浮邱
平生老蒼交夫子賢其尤
窮經三十年一字不見收
賴有管城公落紙無金牛
他時恐不免速達吾所羞

同魏季修雪中閑步

纖纖月色澹黃昏
城郭千家雪照人
攜手望春同茗飲
小坊燈火自相親

寄內

去住初難料行藏只自嫌
天高山簇劔江靜月磨鎌
久

別平安否新愁覺夢魚雙魚何日寄迢遞歲將淹

春雪

太學

陰風度嚴切密雪紛如霧虛窗覺逾明蠟紙黏飛絮
文書不挂眼對榻聊箕踞春愁暗乘人怱怱出非慮
門前亦有酒官禁不可酤永懷傲江湖何當脫羈轡

歲暮述懷寄安常兄

意廣詩餘怨才狂酒見真雪梅新澣淚霜月冷傷神短
劍深藏匣哀絃久委塵良遊惜遲暮雲物又驚春

三月十一日欲往荆南景德寺睡起呈曹令德
風門自開闔門外黃塵暮午衾溫留人春夢如飛絮我
行指洞庭千里始頓屨僕夫呼起起寸心撮百慮此生
睡不足正坐奔馳故四年四往來日月途中度美人亦
念我贈以別知賦英辭粲星斗深語發妙悟坐起再三
讀一一明月句何似謝所投靜默有佳趣

令德送余都門外眷眷惜別余恨不款作詩寄
之

行人不忍別遇酒輒醉倒僕夫怪何遲謬應行亦好憐
君如弟兄每見開懷抱天涯重分攜祖席都門道城頭
傾落日酒盡迹還埽留連意雖勤晤語終草草君如汗
血駒千里未脫皁我若隨波魚圉圉依寒藻去住各有
謀聚散初不保惟餘一寸心耿耿遲君老

同楊遵道出京本欲作詩而吟咏久廢恐取道
襄陽弔古遺迹遵道有作不能多繼也先以詩
謝之

經年不作詩意到無好語強欲理短綆頽井暗塵土夫
子賢達流奔逸不受圉風流夢鱸後清德逼而祖文章
守家法騷雅到前古屈宋或交綏曹劉真臭乳而我獨
何人詞格本寒苦枯腸費搜攪況復久不吐胡為謬見
假亦使郊繼愈無乃緣葭莩遂與噲等伍此行過襄陽
倒指不旬數龐公亦安之孟子不可覩聲名向千載石
刻餘羊杜山川空形勝耆舊一仰俯終當弔遺迹尊酒
酹江滸恐君誠感慨嚴韻儻見侮作詩謝不能亦以丐

斤斧

汝州道中呈遵道

青煙漠漠柳依依
落日雲中鴈北飛
咄咄書空誰的會
遲遲行道子同歸
桑陰蓋地牛羊困
麥秀漫山鳥雀肥
向晚未知投宿處
敗籬疎屋火煙微

承遵道和又用前韻書懷

端的荊州得所依
羽翰終欲更南飛
閩山萬里長牽夢
蜀鳥千言只喚歸
當日朋儕俱草澤
而今兒女自輕肥

白雲南望三年客長是尊前誦式微

春晚書事

揚花撲面春如夢麥穗齊腰日似年多病不緣詩得瘦
放懷全藉酒能仙

自入襄城即有山水之興路中稍賡唱因呈遵
道

風沙久迷神山水忽照眼鱗鱗碧玉甃疊疊青螺綰人
煙盛樂土草樹亦精產雲霞入杳冥禽鳥度杯醞放情

千里迴悟意一笑莞胸襟得奇趣酬唱出新撰蟲魚怯
嘲誚文史困鳩僞我詩實易成澹薄非佳饌君辭頗簡
出嚴絕類燒棧自應即退縮強爾取驚赧微言固可錄
狂論猶未剷勿使俗人知歸途畏書簡

漫興

雲林恰恰鶯能友沙路行行蟻有臣雖有溪山供醉眼
亦嫌塵土汙芳春

晚行

晚煙低埽樹千重一簇人家接遠空日暮荒陂行客盡
只尋牛跡去悠悠

思安常兄

凌虛閣下煙波濶升俊坊前草木香歸去溪南春正好
不應蕭索對松篁

春晚入荊州

綠樹連雲草溼煙亂花飄錦柳飛絲三春別我無多日
萬點愁人又一年池館勝遊空過眼江山佳處欲投鞭

從君豫覓清涼地準備南州五月天

京師相善者鄉友四人各賦一篇以見所慕

適正

澹薄不易親和平不可離平生一尊酒萬事醒復醉詩
成藁不存物至情無累紛紛塵俗中笑裏有真意

載德

辭寡覺我喧氣定覺我煩沈吟孤鶴立戲謔陽春溫豈
不苦鞭策去馬終戀軒由來君子德寡怨非其恩

如愚

義重財自輕氣剛語還直毀譽不挂懷行坐頗自得浮生困局蹙世路亦艱棘思君膽如斗解我愁似織

令德

襟懷冬日溫容貌秋水淨惠然肯顧我蕙葭玉相映詩人固難肥酒客亦多病善保千金軀愛子清而勁

容齋書事

南國餘梅潤東牆更竹陰門庭迂市井草樹似山林客

寄吾家是齋居古意深微風過枕簟何有萬黃金

得用中書有禮人不答之悔作詩解之

一時先達總飄零亦有陽春世莫聽漫刺從來無處著
曳裾今日欲誰經只應舊友頭空白難使新知眼便青
射獵南山休夜出灞陵有尉宿君亭

入荊州學四絕句呈昭祖

問舍求田不可遲十年羈落意多違須知澤雉樊中畜
不及蓬鳩地上飛

卷二十一
拂天喬木映修廊滿目簾閒白
芡忙曾是瑩池疎散慣
臥聽鳴鼓嬾衣裳

短柏森森圍積雪疎篁簌簌撼微風
從前不道容齋好
此景而今落夢中

明知安分即忘歸故倚春風看落暉
叔度汪汪波萬頃
未應如我苦懷歸

春日偶題

未可郊原縱曉鞍人間猶似有輕寒
春光不似常年短

過了清明更好看

自建寧泛江至石首

江注天圍盡舟排浪陣輕岸容疎柳色秋氣斷鴻聲風
日雖堪愛雲煙易妒晴鱸魚如有興好在未知名

送昭遠魚昭祖諸友

離腸如亂絲欲解紛無緒別話似泉源衮衮日夜注幾
年見君文萬里偶相聚一日不易得矧茲寒暑度孤雲
向北飛三鳳各南驚人生類泛梗後約亦何據傷心壁

池東塵土暗歸路憑高極遠目不見籃輿去君如千里
駒奔放尤難御強使就檢繩不入駕駘步何當宴瑤池
定欲求飛兔鹽車未可嘶俛首且羈馵余生易語言開
口初莫慮一從摩詰遊便省默默處何時遂攜孥入隱
高山霧招君賢昆季靜坐契深悟濁醪聊共傾清境煩
君賦況有林下人解道因風絮

寄內

明月向人圓愛之不忍睡坐久風露寒忽忽如心醉念

君一適我所遇無歡意況乃久別離相思到夢寐我生
百不堪繆學屠龍技於今半世人升斗亦未遂賴有室
中友素懷隱居志肯與梁伯鸞扁舟共東逝

奉酬楊達甫見贈

春風不世情煖入閑門草君詩其似之披拂逮枯槁平
生金石友歲晚迹如埽一見楊夫子胸腹便傾倒閒關
六年別一字寄不蚤忽蒙錦繡贈光彩照龍藻嗟我獨
何人揖我謂我好無乃嗜好偏收拾到羊裘從來詩人

窮君亦行此道我亦從君遊山林不知老

小軒觀月呈興宗叔

茅檐手可攀修竹出檐上寒蟾漏疎明碎影羅屏障情
知月色好達覽在虛曠東家富池臺端坐不能訪山林
足寓目細大初無相但使人心安景物自清暢霜風中
夜作曲沼金翻浪禽鳥斷飛鳴杉松起酬唱燎爐宿殘
火尚可溫新釀數杯遣沈冥萬慮一時放誰能外形骸
於世無所仰晤語一亭閒頽然齊得喪

東家謂供
老堂也

流長亭

曹載德
先塋

江折亂山圍西來素練飛嵐光環石窠潭影漾松扉欲
盡風前樹難忘草上暉但期流澤遠長與水東歸

小軒閑題二首

舍南舍北梅牆裏牆外竹迢然寄其閒不見一物俗東
風將小雨夜漲春池綠俯檻數龜魚仰檐送鴻鵠交情
石投水坐客冰照玉從容得此生已矣萬事足誰言南
軒小正可陋華屋但恐世故櫻不容長處獨

青山拱擔楹淥水鑒毛髮花香晚更清鳥語靜不聒客
至不能飲舉觴聊自罰坐嘯激清風起舞弄明月是身
如浮漚起滅在溟渤百年一彈指何者為不沒文章會
消磨名譽易衰歇淵明吾之師茲理久已達

錢唐書懷

遠客真秦贅清時謝楚狂斑衣辭故國青佩久殊方世
俗蠻爭觸余生穀似臧正須逃姓字母使異庚桑

錢唐學中寄伯思六言五首

門外鷺鷥短夢窗閒雨送清寒亦有惜春情緒分明不
奈花殘

點點榆錢委砌冥冥柳絮穿簾日暖野禽爭食紛綸忽
墮危檐

劒水庭闈底處苔溪水月彌深綠草年年離恨白雲日
日歸心

世路紅塵可壓人情白首如新便可閉門端坐不須開
眼看人

部伍亭前歸路鳳凰山下蕭齋我自無聊不住君如有
興重來

下汴

參天古柳鳴蟬急卷地黃流轉岸多好去扁舟穩扶柁
秋風吹水易揚波

登召伯斗野亭

落帆新城曲維舟古河右幽尋得危亭星斗穿戶牖西
風掃殘葉庭宇不待帚娟娟雲間月亦復照杯酒明朝

又東南汙流映衰柳莫以此時心熾然分淨垢

過浦城贈王令長源

半生流落倦塵埃聞說英名首重回
畫虎自慚非妙手割雞空復歎高才
北堂戀戀思歸夢南浦怱怱惜別杯
此去山林真已矣看公雲翮振風雷

題綠波亭

南浦江波綠陽關柳色青
夕陽千古恨分付短長亭

存誠齋夏日呈龜山先生二首

長者一牀室先生五柳門度人聊示病觀物欲忘言小
圃池臺足薰風草樹繁杖藜隨處處歸鳥報黃昏

雙檜軒之北高梧戶以南午陰臨短夢曉吹落清談鬬
老三無喜嵇生七不堪天涯復相值此意得重參

通州夏雨

長風卷地驅炎暑暴雨翻空送晚涼只此蚊蠅俱掃跡
不須迢遞待秋霜

延平林力道閣上觀水二首

千重翠巘分三岸十里寒潭合兩溪
更得橫流吞險巖
豈嫌春水濁如泥

要看春水拍天流更爲溪山一日留
誰遣白雲迷眼界
坐令歸思入扁舟

夢得亭上

雷霆卷地灘聲急旌旆搖空樹影寒
千古西山留爽氣
雨餘客我倚欄看

越州道中雜詩

心息久相依息調心自住忽焉不自知根塵失所寓向
來尚有錐今我已忘兔似入無功鄉不由嵇阮路

人心有默契晤語不在多一笑離凡情萬象皆舍和孰

是忘言人聽此無聲歌有懷閱古堂夢中一時過

閱古堂在

蕭山縣宅

浮雲作秋陰細雨如朝霧放形山水間意適無艱步忽
遇古招提空翠森回互倚杖聽泉鳴悠然不能去

天姥寺

小舟適久雨疎篷常自蔽形留一席間心與天地際逝

者不可作遺編等蟬蛻一念無古今千載若符契

胸中有佳處妙意不期會弄筆作五言心手無內外千
古陶淵明秀句含天籟偶然遊其藩遂爾厭雕繪

我行何所挾萬里一毛穎服勞髮亦禿未語意先領畸
人如告我心清事自省從今中書君亦復免馳騁

和如愚思劔溪

佳人經歲隔參辰柳綠桃紅奈遠情遙想玉樓春睡起
一江風日弄清明

三月二日泛舟下延平晚泊西芹

扁舟劣容身風浪困掀簸曲肱遊華胥夢斷千山過縱
橫波間石滿目牛羊臥秋毫儻不支巨艦忽已破篙師
號神逸卻立變衰懦我豈未之思懸知無可奈此生足
驚憂似為天所憚那能一生死且復耐摧挫日暮同濟
人舉酒紛相賀一笑盡餘觴歌罷無予和

跋子靜所藏魯直書樂天八字偈

疑師八字源則豐樂天說偈流無窮山谷眼明如日中

落筆驚電馳蛟龍誰其得之建溪翁

子靜姓也

取人所棄豈

俗同搜竒挾怪晉餘風嫉邪憤世髮上衝自我觀之紫
兩重巧偷豪奪顧不逢好語傳播人所攻斯言有味當

見容

政和六年七月無諍道人書附子靜所跋之後

次韻鄧志宏送張思道游福唐

紛紛泥耳俱宜洗坐遣高人厭邱里迅流蚤自促行舟
更有西風滿江葦當年筆陣埽千人今日流輩推能文
英辭雄辯灑醉墨倏忽百變春空雲人間萬事秋毫細

軒冕儻來誰著意身隨去櫂落波間興逐冥鴻渺天際
三山便到蓬萊宮卸帆海嶼窺魚龍夜涼橫笛弄明月
萬頃琉璃秋色中

泊舟延平二絕

野梅飄盡喜春歸又見溪桃片片飛醉卧暖風呼不醒
亂紅無數點人衣

星河不動水東流夜影遙空逼釣舟夢破滄浪歌在耳
欲尋溪友向煙洲

和李伯紀舍人韻

時來將相寧有種
衛青故是民家奴
懸鵝未用歎歲惡
濶網近喜除官逋
本無得喪任失馬
但有言說皆陳蜀
從公一飲百壺盡
醉倒不知誰謂吾

陪知縣夜飲泛碧齋再用前韻

暑雨初收水拍潯
溪光南北影千岑
移舟為愛玻璃濶
放盞那知琥珀深
緩帶小風來水面
倚欄涼月轉天心
酒酣更駐凌波戰
直待銀河夜色沈

書室獨坐

春入庭柯寸寸藍風檐孤坐怯輕衫青天白日從來好
柏樹桃花子細參

自浦城放船下建安寄龐幾先

扁舟西下趁殘陽目斷雲邊歸鴈行短檣莫辭風浪惡
人間平地有羊腸

奉陪龜山先生觀修城

西山_張嶽送斜陽往事回頭一夢長萬里喜霑新雨露

百年重拓舊金湯
杵聲撼野雷初動
插柄揮風蟻自行
尊俎折衝今可恃
補牢端為念亡羊

廖成伯奉議生辰

曾聽尊前世綵歌喜聞煙袖舞婆娑

用中建堂名世綵叔祖諫議有小詞

云綵衣長久五世祥煙熏舞袖故云

名駒汗血得夷路老柏凌霜只舊柯

桃李盛時隨地有芝蘭生處近人多
春風二月年年事莫問靈椿歲幾何

交溪靜安院見許尉題壁次韻

柱頤修劔上凌煙自古功名亦偶然
鍾鼎山林俱不惡
一瓢吾欲盡餘年

俞憲生辰

代龐
幾先

淮南持斧功成後
甌粵乘輅喜暫臨
使者英標衣蹙繡
近臣新渥帶橫金
三山氣入中秋好
八郡香焚曉霧深
已為黎元開壽域
可無椿歲慰人心

鄭漕生辰

代幾
先作

至公無轍迹
萬變歸諸正
誰云學則然
要在成以性
我

公鍾閒氣異稟剛且勁一毫不容私心境自澄映超然
是非表燭物眼常淨還將溟渤量一了百川競由來仁
者壽茲理天所命欲知椿齡永視此寬平政桂花弄小
春晚香適再盛年年幾望月影泛杯中聖尚書心如水
遠裔有餘慶

鄭相也

何以繼清風家聲南北鄭

戲題延平閣上

黃昏欲去更憑欄珍重銀蟾照膽寒可是歌眉能繫別
人間無此好溪山

西風吹露溼我冠
迴立三山二水間
後夜江樓應殢酒
一鉤殘月與誰看

寄養蒙魚呈景駿

粥魚齋鼓網蛛窠
古寺長廊客少過
唯有一溪明月在
夜寒偏向斷垣多

斜陽不到竹陰幽
小徑縈紆傍碧流行
到草深橋斷處
卻乘明月泛歸舟

太史溪頭十里閒
朝陽峯下水涵天
青鞵不踏紅塵陌

夢斷僧窗又一年

翫月

據牀招佳月月轉牀屢移夜久風露涼孤斟樂忘歸冰
輪擅空濶是處留清輝浮雲埽除盡如與賞心期我行
萬物表中空無一疵光明偏十方毫髮了無遺心境互
融澈起坐迷東西此生看此月十年悼無時他日客共
飲淋浪酒霑衣十語久不契此心唯自知西風埽殘暑
秋色日益奇憂國付鼎食消閑屬山棲恐妨此時樂勿

露囊中錐

道出南浦見蕭子莊

霧壓山城石徑遙
筍輿乘月渡溪橋
已投柳舍人方起
卻訪鱸堂市未囂

牆仞未容肩可及
豹斑時許管能窺
相逢一笑無餘事
明月滿懷心自知

雨絲收盡暮天涼
萬竅號風釀曉霜
待趁新晴出閩嶺
夜譚還喜漏偏長

平生交契獨公深
歲晚邨無裹飯心
白首他年林下約
此盟端的幾時尋

斯文初不閒衡茅
但有元經豈患嘲
騏驥從他千里足
鷓鴣容我一枝巢

二月五日入都廳
久坐候山甫不至
廳前桃花
一夜風雨落盡
感事寫懷

簿書堆裏只悠悠
過眼繁紅夜雨中
可念青春看又老
一杯無計略從容

曉登嚴陵釣臺和安止所留詩

溪山有底好適契貧士欲敢論生不侯但喜夢非僕千
秋釣臺水不濯市朝足而我獨何人得寓塵埃目攜筇
終朝步初日穿林麓西風扶兩腋一舉千里鵠東窺夫
差國繁華混真俗濁流駕頽波一往不可復之子居其
閒嗜古追前躅為寄無絃琴一和郢中曲

過崇仁莫宿山寺書事

驛路塗泥一尺深竹輿高下歷千岑愁霖澆盡梅梢雪

把酒無人慰此心

山行

浪蕊浮花逐去程
流紅應恨水無情
擔間頗厭催歸語
木杪空憐喚友聲
念遠卻回鴻陣急
忘貧重到燕巢成
待憑物理追風御
懷抱如今喜盡傾

偶成

雲路橫翔計似疎
疎原清賞更誰如
池塘草滿供詩夢
煙雨春來入畫圖
落莫蚤知貧是病
差池今悟直為迂

傍人大笑公焉取為說忘機或類吾

和司錄行縣道中偶風雨有感之作

茶蘼臥雨有餘態芍藥倚風無限情正是江南花欲盡
淡雲來往日微明

山頭漠漠煙藏樹山下潺潺水滿溪全勝長安花柳陌
萬人塵裏逐輪蹄

饒州張宏中挽詞

畫棟雕甍照水邨簪裳多在春令原百年得計南山豆

萬事忘懷北海尊自昔功名何世乏迄今文字幾人存
遺書儻有毫芒在為語韓公請備論

次韻李聳卿賀太守禱雨有應

使君憂國願年豐
宵放炎威久病農
盡道胸中藏渤海
誰知筆下起蛟龍
曉涼秋氣生蘄簟
夢斷檐聲帶梵鐘
高臥已傳民訟息
祇應仁政古難逢

歸自郢城見道中山礬盛開

梅豆班班已滿枝
暗香猶未吐荼蘼
和風煖日江南路

正是山礬爛漫時

山寺蚤梅三首

竹籬茅舍近前溪
煙澹風微月上遲
認得暗香來去處
夜寒無路覓橫枝

冰雪情懷未遽開
芝蘭風味已先回
故人隔歲無因見
一夜月明何處來

丹萼猶含綽約肌
水邊籬落雪晴時
此間妙得無言意
只有西湖處士詩

眉溪與光祖共譚

青山雨後足奇態好鳥檐間無俗音縱使麴生難會面
可無毛穎解傳心

流泉為演祕密藏枕上聲從澗底來半夜夢回聽說偈
似傳衣鉢向黃梅

溪邊索共桃花笑雨打風吹埽地空待訪靈雲舊消息
急流無處覓殘紅

次韻陸時可歲暮感懷

小橋橫截一溪雲，隔岸遙通避世人。
釣艇偶隨秋鴈泊，吟窗今見臘梅新。
煙塵已覺千山靜，雨露行看萬國春。
詩酒暮年生處樂，一瓢歸去豈辭貧。

和時可

芝眉不見忽經旬，屢出新篇故惱人。
應共翰林爭敏捷，豈如開府但清新。
雞豚且入他鄉社，桃李何殊故國春。
白髮蒼髯共攜手，從來管鮑兩忘貧。

初到臨安二首

風際管弦朝病酒雲中樓閣夜聞香十年一夢沙河路
獨步春泥覺燕忙

青鞵踏雨花鋪徑朱艦凌風柳拂隄天竺舊遊心已嬾
孤山行處路應迷

錢唐江

潮頭駕月衝殘夢水色浮雲送峭寒十幅輕蒲連夜發
不知身到海門山

次韻王長源飲垂絲海棠花下

寇盜縱橫已十春今年花下得微醺
應憐萬木灰薪蘓喜見奇葩脫斧斤
遣將幾人非鞅鞅覆盟今日尚焚焚
憑君為國施長策莫戀垂絲鄙獻芹

鄧李明挽詞二首

少年長揖出賢關自許行藏契孔顏
雲路不求千載遇簞門贏得一生閑
奇言盡埽雞三足妙意誰窺豹一斑
盡道東山如李漢會傳餘論落人間

他時奉使蚤還鄉駐節旁連避世牆
鴈序風標連破萼

鳳雛衣袂挂飄香花邊對酒春難老竹裏圍碁日自長
曾共國人歌友愛傷心重到棣華堂

和參謀至日喜雪

協氣方占大有年珠璣填道壁沈川塵埃已洗三千界
雲霧終開尺五天羔袖久慚依帥幕牛衣端不羨蠻氊
求田好趁豐登候乞與元龍榻上眠

次韻吳參議病中懷歸因以自見

柳絲垂地整如梳春盡長懷舊隱居草煖屢眠斜照外

水香時漱落花餘
西山忍餓初疑隘
北海無功竟坐踈
同是念歸公得請
自憐濡滯一軒渠

次韻安茂國同薛參議上巳日倡和

扁舟衝浪去

茂通監造船

羸馬傍城行

子發監修城

飄泊傷春緒

艱難作吏情
豈無賢者樂
亦有聖人清
莫繼蘭亭會
愁連曲水生

三月二十日遊東山參議不至有詩次韻

羈懷厭朝市
逸興薄江山
放杖囂埃外
傳觴紫翠間
碧

雲猶未合飛鳥已知還不見高車過重城欲上關

次韻延平弟

經年侍清晏飽食愧侏儒脫迹駕鴻路忘懷草木區朝
擔看關雀晚檻引飢鳥已覺蓬蒿適誰能九萬圖

次韻宗仁弟

吾閩山水國幽絕勝衡廬隱几雲生席開軒柳映渠連
枝均魯衛異說屏荆舒此外無他慕何門可曳裾

鄧端友臨要閣

昔年曾到十三樓一日西湖十頃秋寒碧軒中最宜暑

只緣修竹近清流

寒碧軒乃西湖上十三樓之一絕似此景故云

誰家多竹門可款臨要閣前沙岸傍謾道薰風能解愠
正應蒼玉自生涼

慶鄧德達得子

海中仙果真難得天上麒麟必異才
速客未為湯餅供薦觴須俟鯉魚來

題興國寺碧落軒

北山其下僧伽塔影落軒前草樹閒誰向月明看白牯
靜中相對兩俱閑

端友以桂漿兩罇見惠

秋水無聲瀉玉甃鏡奩初啟淨無塵未將滋味誇殊勝
已覺風神最惱人

鼠竊跳梁十二間數杯中夜得安眠千艘雷動人方擾
一榻山頽我自仙

和燦老

江靜微波皺，穀庭空落絮。鋪茵正是鄰，牀作夢直須款。

款反

平聲

秋堂遺藁

柴望字仲山，文溪人。倜儻有氣節，往來都下名公卿，俱客禮致之。高宗朝，叩闕上書，議論抗直，忤旨，遂繫獄。旋奉詔放還。晚年山居杜門，謝絕世緣。然其愛君憂國之意，時寓於詩。如昭陽殿云：「至今人見飛來燕，猶為君王暗斷腸。」即事云：「翠華海上知何似，白首。」

山中空自驚和弟通判隨亨書感云莫語淒涼當日
事劒歌淚盡血霑纓一腔忠憤惓惓不自已讀其詩
可以見其志云

吳樵溪山居

老子無家計蕭然屋數間頭邊惟白髮眼底是青山
暴急鳥聲散琴低鶴睡閑片雲長似伴朝去暮飛還

靈芝寺別祖席諸友

落日寒城暮雨餘滿斟離酒意何如見妻還指張儀舌

痛國誰憐賈誼書羸馬病僮旋在債寺禽山獠亦歎
長安可是深居處更向深山深處居

和周居易見寄韻

十年為客上長安人指冰山不會寒開口盡言授老易
到頭只是挂冠難低棲屋宇居常穩巧小園池坐儘寬
別有前溪魚可釣也須栽竹傍闌干

越王勾踐墓

秦望山頭自夕陽傷心誰復賦淒涼今人不見亡吳事

故墓猶傳霸越鄉
雨打亂花迷複道
鳥翻黃葉下宮牆
登臨莫向高臺望
煙樹中原正渺茫

送馬太初之越

一去山陰一再溪
如何還只任分攜
雨無聊賴人無寐
水又潺湲鳥又啼
明日不知君上馬
中宵誰與共聞雞
去時應有蘭亭句
為我臨池拔筆題

戒珠寺右軍宅

暮樹寒煙兩渺茫
復來誰此弔興亡
晉朝風物今流水

蕭寺鐘聲幾夕陽
語燕梁空春雨急
愛鵝人去暮山長
學書弟子知何在
風過池塘墨尚香

和王景陽越中寄別韻

故人書只問平安
分已還山豈願官
猿鶴不驚松逕夢
貂蟬難換竹皮冠
長安葉落秋深見
故國斜陽雨後看
莫道剡中吟不盡
不成吟處亦停鞍

西施

十二金釵對對鋪
三千粉黛膩如酥
君王莫道六宮醜

一箇西施已破吳

范蠡

五月菰蒲八月秋年年灑淚酹江頭
伍胥忿怒三閭怨爭似鷓鴣夷一釣舟

金臺泊舟

欲謀歸去計歸去更怱怱王化何時北江流
日夜東片帆山共水竟夕雨和風時事只如此
相催成老翁

宿湖外

嬾入城中去來維柳下舟空江明月上殘雨夕陽收好
景多歸夜他鄉易得秋倚梧吟不盡攜酒更登樓

金山寺

荻花蘆葉正珊珊山在長江寺在山門逕但從船出入
僧房多住水中間江空落日斜猶照夜半秋潮去復還
吟興未闌天欲曙一行斜鴈起蒼灣

石頭寺和王寧翁韻

懷鄉弔古易傷心絕頂危亭共客臨朝市幾經兵火後

山川轉覺樹雲深百年歌舞空臺沼
六代豪華漫陸沈
惟有亂鴉歸去晚夕陽無限暮城陰

多景樓

蚤被垂楊繫去舟五更潮落大江頭
關河北望幾千里
淮海南來第一樓昔日最多風景處
今人偏動黍離愁
煙沙瀕洞翻蘋末欲倚西風問仲謀

山陰蘭亭

寂寂山陰事已塵至今亭址尚嶙峋
落花時節朝朝雨

插柳人家處處春
曲水自流寒食酒
茂林無復永和人
昭陵繭紙今何在
空有梅花點翠珉

別故人

便未成名也自歸
不應猿鶴更猜疑
冷看世事頻移局
懶與仙人更奕碁
南渡只今惟有酒
西興臨別是誰詩
行藏正要知時節
卻是時人未得知

送葉石磯之金陵謁信菴

一片斜陽落渡頭
青袍烏帽獨登樓
江流建業三千里

山色淮南數百州都督正開羊祜府誰人得上李膺舟
此行不為揚州鶴一字堪封萬戶侯

歸來

歸計年來付酒杯任他猿鶴自相猜東家種竹西鄰看
前日移花昨夜開鐘送夕陽歸草木風吹涼月上樓臺
老來嬾聽他家曲歡看柴門長綠苔

寄徐編校

近傳丹詔下彤墀夜鶴寒猿也自疑江上晚風終是急

山中白日最相宜
潮生潮滅鷗先見
花落花開蝶未知
懷玉山人如問我
爛柯山下看圍碁

重到都門倣轆轤體

兩年不作京華夢
重到湖山事已非
柳外晚風寒日節
花開天氣雨晴時
闌干獨憑鶯飛去
簾幕低垂燕未歸
故托焦桐理心事
滿庭芳草又斜暉

金陵秋赴別江壽翁

憶向西風折翅歸
每欣黃菊滿疏籬
十書詣闕無知己

千里離家有路岐歲月易驚孤客夢文章難比少年時
荻花蘆葉休淒怨自有新開實挂枝

蘇武

十九年間不辱君論功何獨後諸人若教倒數凌煙像
也是當時第一人

子陵臺

曾與劉郎共起居如何不肯受除書最憐人笑先生錯
正好為官卻釣魚

奇氣樓

此齋全占崧高勝更盡樓前第一奇
芳草碧連天水處數峰青斷暮煙時
山川不逐陰晴換宇宙閑看歲月移
琴已懶彈書懶讀一簾花影詠春遲

高齋晚望

纔是青山便卜鄰世情那得較紛紜
霧連岫遠分為雨煙起人家去作雲
柳色晴光扶檻入鶯聲人語隔窗聞
高齋獨卷重簾坐花落碁牀日未曛

西湖

年年柳眼青歸處門外遊人可自閑天氣又晴晴又雨
樓臺依寺寺依山酒邊歌拍穿花外船上簫聲落水間
光景留連空自惜鷓鴣啼罷暮城關

山居

老來無一事童與鶴相隨繞屋疎疎竹編牆短短籬起
來花換影知去睡多時莫厭山居寂山人祇合宜

客中夜雨

離情先怯向邊州寒葉敲窗更報秋幾點攪殘千里夢
一聲滴作兩鄉愁苦緣楊柳霑離席偶傍梧桐戢小樓
惟有孤燈照明滅夜深無語擁重裘

江心寺

寺北金焦徹夜開一山卻似小蓬萊塔分兩岸波中影
潮長三門石上苔遺老為言前日事上皇曾渡此江來
中流滾滾英雄淚輸與高僧入定回

肥水

想見西風對壘時
目中先已料安危
淮淝百萬兵雖衆
未抵東山一局碁

別永嘉使君趙致軒

一番出處計何如
流泊中州不為魚
落日淒涼秋老矣
西風澹蕩客歸與
吟成白髮逢知己
費盡黃金買古書
明發灞橋橋上路
藉君帆力更吹嘘

蘄州別友

客中逢客上夷陵
輾轉淒涼睡不成
無酒送君之遠道

有誰吹角向江城白髮亂生人漸老青燈相對雨無情
詰朝共發蘄州岸知到江山更幾程

上忠齋丞相

世事篙人一葉舟長歌短櫂發中流今朝正得東風便
纔是西風便轉頭

江南江北路迢迢往事東風恨未消昨夜杜鵑啼不了
始知春在洛陽橋

九陌紅塵撲帽紗囊書幾度進官家近來不甚知時事

只是栽桑不種花

即事

頌洞風塵莽未明天翻地覆却將盈翠華海上知何似
白首山中空自驚笑向鶯花非世界夢迷弓劍繞皇陵
誰知薇蕨同杯酒為酹興亡終古靈

和通判弟隨亨書感云

風沙萬里夢堪驚地老天荒只此情世上但知王蠋義
人間惟有伯夷清堂前舊燕歸何處花外啼鶻月幾更

莫語淒涼當日事
劒歌淚盡血霑纓

于湖集

張孝祥字安國歷陽烏江人父祁與胡寅交善秦檜惡寅羅織及祁并寘獄孝祥年十六領鄉書紹興二十四年廷試考官擬秦埴首選孝祥次之埴檜子也高宗親自披閱擢孝祥為第一檜忿甚喑曰胡寅雖遠斥力猶能使故人子為狀元邪後孝祥詣檜檜問習何書答以顏書又問學何詩答以杜詩檜佯笑曰

好底盡為君占卻也。檜死累遷起居舍人。歷知撫州。平江。靜江。俱有聲績。尋以荆南湖北路安撫使進。顯謨閣直學士。致仕。卒。孝宗惜之。有用才不盡之歎。孝祥精於翰墨。時稱之。曰紫府仙所著。有于湖集四十卷。原本失傳。僅存詩絕句二卷。

玉淵

靈源直上與天通。借路來從五老峰。試向闌干敲拄杖。為君喚起玉淵龍。

萬杉寺

老榦參天一萬株
廬山佳處著浮圖
只因買斷山中景
破費神龍百斛珠

楞伽寺

朱砂峰下楞伽寺
白髮僧生乙丑年
乞我一杯清淨水
為扶脚力上層巔

天圍欲盡三千界
地險真成百二關
不向中峰最高處
諸君元未識廬山

鸞溪

蒼龍翔舞餘千仞
瀑水奔流欲百盤
定是山靈憐寂寞
故教臨鏡有窺鸞

猗蘭堂

水漫春洲到處通
檣竿無數插空濛
主人只愛堂前水
不放廬山入眼中

和家君韻寄舅氏

夷齊之清格鄙頑
孳孳盜跖何曾閑
空齋風定香纓直

但有書冊猶相關

萬里歸來無首肯扁舟共載兩猿君
今日送君向何處
黃鶴山中多白雲

子餘許修草堂遣句勸請

蓮社高人久寂寥草堂風物故蕭蕭
追還舊觀須公等
喚我他年寄一瓢

次韻南軒喜雨

午窗溜雨忽潺潺想見欣欣阡陌間
敬簡堂中有新事

水滿新池雨滿山

北風吹雲如裂絲赤龍卷水尾倒垂雷轟電激不敢駐
驅入吾家喜雨詩

使君保障如繭絲可憐民屋如罄垂今朝一雨秋事了
便可高咏豐年詩

天公有意不作難一雨千里須臾間但得湖南今歲熟
我亦腰鑣歸故山

從吳伯承乞茶

三月新茶猶未識作詩去問野堂君春風有腳家家到
定為麤官不見分

送僧遊天台

寶剎憑虛五百仙猶將心事向塵邊煩君試問橋東寺
若箇而今又應緣

石惠叔以石斛為貺因筆賦詩

截得蒼山一段秋千峰萬壑翠光浮虛堂百尺瑤璃簾
對此真堪作臥遊

題趙知府墓

翁仲無聲石馬閑
墓門蕭瑟鎖青煙
故人仰臥青松下
落日孤邨聞杜鵑

朝謁南嶽

泰華嵩岱拱神州
玉帛閑來四十秋
卻對朱明回北首
憂時淚併九江流

題方務德靜江作雪觀

昔日主人今法從
空留偉觀古城隅
邦人指點思遺愛

我亦先生屋上烏

和伯成送茶韻

佳句新茶亦太奇
嘗新即日未全遲
埽除鴈鶩行邊事
細碾春風細讀書

有懷長沙知識呈欽夫兄弟

順寧去覆郎官錦
府谷仍監太府錢
惟有吾宗老兄弟
閉門依舊絕韋編

春風花柳又芳妍
更接髯郎水竹園
小閣橫橋俱勝絕

只因欠我共開尊

召公分陝是東隣
天遠堂中好主人
更喜新來黃太史
賸拚佳句了新春

髯郎高臥元無恙
何日湘濱具一舟
官約春風同過我
為公醺酒炙肥牛

題塔子寺

茶蘼壓架玉交加
深院無人落落花
卻憶江南田舍樂
旋敲新火煮新茶

題斷隄寺

柔桑細麥綠油油
雲水烘春爛不收
馬上因來尋歇處
斷隄寺裏半時留

隄邊楊柳密藏鴉
隄上遊人兩髻丫
可惜行春來較晚
誰家留得碧桃花

古寺留春最得多
紫薇花畔海棠窠
無人歲晚同幽獨
古柏森陰著薜蘿

遊湖山贈圓禪六言送萬老

桑下不須再宿囊中莫留一錢打鼓退高臺寺洗腳上
五湖船

遊湖山贈圓禪六言

素香無脂粉氣好語諧韶濩音有人問西來意門前秋
水沈沈

次東坡先生韻

微涼入船窗秋水滿湘浦過盡前頭灘又得夜來雨
人魚不相及挂顏以香餌因循十年錯歸計覺今是

悠然望江南日出煙靄微倚門雙白髮屈指待兒歸
漁師未賣魚船小風蕩漾得錢瞥波去不怕江流漲
朝發方良磯暮宿白水灣寬作一月程須見江南山
我程可點數中秋過江池趁得江南米新春滿玉簪
棧羊割肥紅社鑿潑濃綠再拜為親壽起舞自作曲
閉門靜觀心踵息閤天和從渠江頭人尺水一丈波

題梅塢圖

并序

尹孺文往時住廬山名所居曰梅塢蓋一邱

一壑自在孺文胸中觸於外者感乎內信乎
其有樂於此也孺文遇異人得丹竈術蠲疴
起死探囊一笑客建康寺久之邂逅故人恐
其遂忘歸也為此圖殆騷人招隱之意然聖
賢之學不但為己孺文窮困悼無以施之人
一寓之樂真得道者所為儻又欲按圖尋故
巢翻然而往其可乎哉

我曾到梅塢正自畫不如是處有風月君毋懷故居

歸宗寺

兩峰雙澗水萬古一篇詩玉局竟仙去空山無此碑

煙雨觀

七澤闌干外茲遊亦壯哉主人何處去猶未賦歸來

贈萬上座

過了鐵圍山復生金蓮臺與問萬上座一笑愁容開

野牧園

吳牛三十角久與牧相忘忽憶淮南路春風滿柘岡

秋晚稻生孫催科不到門人閑牛亦樂隨意過前村

題畫

權郎筆墨禪往者屢參請斯人骨已休妙處一笑領

昭亭食柑

一雙分我洞庭秋
梨棗傍觀不那羞
喚得風霜回齒頰
夜從清夢五湖舟

和如庵

厭聽諸方三昧禪
卻思夜雨對牀眠
欲知千偈如翻水

看取朝來綠漲川

朝供香爐夜供燈
閑來落得困瞢騰
如庵許我參堂去

長作昭亭粥鉢僧

道人受記自然燈
筆底光芒夜夜騰
詩成十手不供寫
鑿齒敢對彌天僧

蘄春道中

霜淨波平水落灣
我行正在畫圖間
簾鉤不用怕風日

且看江南江北山

次江州王知府叔堅韻

說河不救癡兒渴砥柱乃障顙波流庾公樓中三昧手
何年來侍殿西頭

霜餘江北山如舊歲晚家鄉稻作京萬里公方黃鵠舉
扁舟我自白鷗盟

今朝放纜好天色過午忽作打頭風卻望江州纜十里
我船且繫蘆花中

廬山突兀上霄漢使君豪氣與相酬廬山雖好不足戀

歸矣當為蒼山謀

連城鼠璞不足唾千金敝帚誰能酬只合機會不容髮
願借前箸君當謀

谷蘄釀酒極清美風味太似主人翁我有一尊正傾瀉
卻思煙雨庾樓中

何人列屋閉嬋娟憶對清歌重慨然一笑相憐窮相眼
謾撩詩思入愁邊

道間見梅

寒女生來不解妝天然玉色照孤芳疎籬茅舍無端恨
故有幽人與斷腸

題定山寺

時十六歲

寒驢夜入定山寺古屋貯月松風清止聞挂塔一鈴語
不見撞鐘千指迎

千山蒼茫月東出萬木擺搖風怒號幽人隱几撫羣動
清燈明滅爐煙高

雪中紙衾有奇趣煖香夜作椒蘭熏毘邪丈室本無病

天女為散花紛紜

雪花如席風色惡擁被爐圍門不開我亦窮攔車馬絕
一杯相屬望君來

將至宣城和壁間韻寄王宣子

一笑歸來見在身倒傾江水洗緇塵騎驢緩緩東風裏
知有工夫展故人

隱靜覓杉株

舊聞隱靜樓前柏虎嘯龍吟三十秋我亦經營一邱壑

無根樹子卻須求

題夏氏莊

平湖漠漠雨霏霏
壓水人家燕子飛
欲向湖東問春色
杏花無數點征衣

小憩孫氏竹軒觀諸公詩

開軒種竹仍留客
想見此翁強健時
借我繩牀小盤薄
為君試讀壁間詩

種竹主人今白髮
題詩客子半青雲
北來南去何時了

風月依然只此君

豐城觀音院有胡明仲范伯達汪彥章諸公題

字

中興人物數諸公遺墨淒然野寺中欲訪英靈無處所
獨搔蓬鬢立西風

入桂林歇滑石驛題碧玉泉

百折崎嶇嶺路頭一環清駛石間流須君淨洗南來眼
此去山川勝北州

和都運判院韻輒記即事

登臨不但為山水
玉節政爾觀民風
因君引我看勝處
詩在千山煙雨中

平生煙霞成痼疾
置在朝市殊不宜
夢尋歸路向何許
淮南小山生桂枝

先生名字帝所識
征車在道已相望
蚤晚鳴珂朝玉闕
朱衣已在殿中央

綠蓑青笠舟一葉
黃麻紫誥言如綸
若扶日月行黃道

我向江湖作散人

君詩我續貂不足曹鄴大楚非匹儔要知二人倡必和
異日盛事傳中州

敬謝經略祕閣餘甘湯

甘言誤我三折臂良藥為洗五斗腸欲知苦過味方永
請試君家肘後方

此老才堪上諫坡南州留滯意如何還將苦口劇英主
醫國懸知藥籠多

德慶范監州以紫石硯寵假雖小而奇戲作

曾侍虛皇玉案前夜書繭紙筆如掾莫嫌此石規模小
一寸元雲萬斛泉

端溪別駕極風流白璧明珠不暗投笑我支牀已多許
須君隱几更冥搜

以水仙花供都運判院

十月西湖冰齒涼梅間松下小齋房幽芳靚色天為笑
落莫南求也自香

瘴土風煙那有此卻疑姑射是前身冰肌玉骨誰消得
付與霜臺衣繡人

再和

雲屋因君發妙思作歌可比漢芝房根塵已證清淨慧
鼻觀仍薰知見香

玉壺寒露映真色霧閣雲窗立半身可但凌波學仙子
絕憐空谷有佳人

和仲欽題粉巖

一麾縻我欠追從，悵望千山紫翠重。
忽向郵筒得新句，知君正在碧蓮峰。

仲欽寄民為齋詩和答

齋中寒食影龍蔥，齋外參天十八公。
二十四州民樂否，莫教一物歎途窮。

玉節南來兩使星，埋輪折檻有家聲。
不嫌齋榜民為重，去國當時一葉輕。

德意丁寧到綠林，都捐刀劍作齋民。
皇華入奏天顏喜，

趁得朝元第四春

行邊使者幾時回
寄我清風欲滿懷
已把十詩鐫樂石
為公滿意落新齋

蠻煙瘴雨侵行李
每向南雲有所思
定自為民忘涉險
請君細讀寄來詩

小山集

劉翰字武子長沙人紹興間于湖張孝祥石湖范成
大方名重一時翰遊於二公之門故詩聲日著久客

都下迄無所就嘗效楚語作秋風思歸歌以自寓其
辭曰采中洲兮蘭蕊望美人兮千里我所思兮天一
方共明月兮隔秋水可謂怨而不怒深得騷人之遺
著有小山集

桂殿秋

青帝子碧蓮宮不駕雲車騎白龍瑤池路遠羽衣溼玉
珮泠泠明月中

雙玉節到神京碧杯仙露冷如冰一聲金磬千花發洞

口天風吹酒醒

翠屏曲

小亭簾幕垂陰陰梅香入枕春生屏西窗月落翠被冷
鳥聲殘夢東風醒三年不喚清溪渡夢裏灑西春水路
江頭女兒雙翠眉能唱劉郎芳草句

小宴

一曲歌雲勸玉觴歸來斜月恰侵牀小窗細嚼梅花蕊
吐出新詩字字香

種梅

淒涼池館欲棲鴉
采筆無心賦落霞
惆悵後庭風味薄
自鉏明月種梅花

紅窗怨

啼鶯喚起紗窗夢
紅日滿簾花影弄
翠屏香字冷熏爐
羅衣疊損金泥鳳
去年君去燕歸時
今日燕來君未歸
欲把相思挑錦字
夜寒嬾上鴛鴦機
起來翠袖香羅薄
東風滿地桃花落

漁父

輕舟一葉一輕蓬
上有蕭蕭鶴髮翁
昨夜不知何處宿
月明都在笛聲中

春晚

風日蕭蕭兩鬢華
倦尋銀筆賦餘霞
五更枕上無情雨
三月風前薄命花
春困有時因病酒
客懷何日不思家
年來事事心情嬾
惟有歸耕策最嘉

上元小亭

靖康詔令文章種桐邑公侯國老家種得人間桃李滿
春風無地不開花

石城頭

離離芳草滿吳宮綠到臺城舊苑東一夜空江煙水冷
石頭明月鴈聲中

天上月

春冰一片淨無瑕萬里清光遍海涯欲與嫦娥移桂樹
月中先合種梅花

春日

沈沈芳酌動金波
笑引疎梅泛玉荷
幾度天寒歸鴈少
一番風雨落花多
功名好在知心嬾
富貴重來奈老何
鳥鵲數聲傳喜語
梁間燕子亦能歌

江南曲

我家江南同野老
自紡落毛采蘋藻
清風滿袖讀離騷
半畝幽畦種香草
門前流水鳴濺濺
日暮歸來自刺船
遙山數疊作蛾眉
落日斷霞明晚川
雨餘汀草漲新綠

紅衣溼盡鴛鴦浴采蓮女兒何處來
唱我春風湖上曲
甕頭酒熟方新篛白魚如銀初上鉤
呼兒洗杓醉明月
酒酣更作商聲謳

鴻門宴

江東遙遙八千騎大戰小戰七十二
劉郎曉鞭天馬來
蹴踏長安開帝里子嬰已降隆準公
君王置酒鴻門東
張良已去玉斗碎三月火照咸陽
紅繡衣歸來日將夜
可惜雄心天不借當時已失范增謀
尚引長戈到垓下

刁斗乍急營壘驚夜深旗尾秋風橫玉帳佳人不成夢
月明四面聞歌聲拔劍相看淚如雨我作楚歌君楚舞
明朝寶馬一聲嘶江北江東皆漢土

吳門行

吳歌婉婉清如水西風曉自閭門起雙撓艇子采菱來
翠葍綠蘋香十里芙蓉影落已知秋濺溼羅衣眉黛愁
回身蕩槳入門去明月家家秋水流

客去

送客歸來月滿檐
梅花微笑隔疎簾
酒醒今夜銀屏冷
沈水熏爐旋旋添

哀友人

按成歌舞小春嬌
何事君隨草木凋
從此巴江江上月
有人和淚獨吹簫

聞笛

誰將玉笛按涼州
吹徹春風不下樓
若道聲聲都是恨
不知消得幾多愁

小亭

芳草萋萋怨未歸
西池殘夢要題詩
綠窗昨夜東風小
開到梅花第幾枝


題飛雲閣

一笑歸來春尚寒
小梅飄盡雪初殘
遲遲更待梨花月
醉倚飛雲十二欄

立秋日

亂鴉啼散玉屏空
一枕新涼一扇風
睡起秋聲無覓處

滿塔梧葉月明中



宋百家詩存卷二十